


曾南丰全集



曾南丰全集

上海仿古書店發行

一九三六年七月初版

全二冊

定價國幣三元六角
實價國幣三角六分

著者 曾南豐

發行者 仿古書店

上海自來火街西高第里一號

承印者 啓智印務公司

上海西門路潤安里十九號

代售處 各大書坊

曾南豐全集

版權所有

總代售處 上海啓智書局

曾南豐全集卷下

制誥擬詞【三】

祕書監制

帝王之治。必有圖籍之藏。又擇當世聰明拔出之士。聚於其間。使得漸磨文學之益。獎成其材。以待國家之用。故書省之設。吾不計近功。而要於廣畜德。所以厚其禮秩。而艱於用人。庶以明朕好古樂善之勤。而勵學士大夫之行也。某多識博聞。操守純篤。諸儒所尚。今聞惟舊。延處茲位。蔽自朕知。夫尊其所聞。而行之不倦。使輔於世教。而其效可言。非獨優游冊府而已。在爾自強。以承朕意。

著作郎制

麟臺著作之任。郎以詞學爲之。必惟其人。爾以材選。惟能明於理要。乃可見於文章。其尙勉於厥修。朕方觀汝之效。

祕書郎制

祕藏四部之圖籍。郎所守也。職清秩美。必也屬之其人。爾以材稱。俾服茲選。尙惟敏於畜德。朕方觀汝之能。

正字制

是正文字之官。實爲儒學之選。宜體育材之意。勉思畜德之勤。

殿中監制

分職殿內。參侍左右。監總六尚之官。以供服御之事。位視九列。禮秩甚優。正名之初。考請惟慎。某明習吏治。勞閱有聞。選於在廷。俾踐厥任。往其祗飭。無忘訓詞。

殿中丞制

丞於殿中。參總六尚之官。而察其稽失。出於公選。首以材升。尚務欽承。方觀汝效。

太常丞制

丞於奉常。參總禮樂之事。祠祝之儀。惟學古知方。乃能不失其守。尚務祇飭。以服官箴。

衛尉卿制

典領宿衛之官。地親責重。位在九列。禮秩甚隆。考擇其人。屬任惟慎。某忠篤謹信。濟以材敏。周廬屯候之士。武庫弓鎧之器。往顯總治。僉曰汝諧。其尚懋哉。以祇朕命。

太僕卿制

書曰。僕臣正。厥后克正。蓋親近左右。有輔導之義。矧車府廐馬牧監之政。莫不容焉。非得其人。曷稱厥位。某材質敏明。久更器使。司馭之選。汝惟克諧。其祇厥官。以服朕命。

大理卿制

折獄詳刑之事。朕所重也。典領之官。位在九列。正名之始。選用非輕。某明習吏治。通於法令。廷尉之任。僉曰汝諧。往往欽哉。以率厥屬。【少云參典之官位茲九列】

國子祭酒司業制

學校之法。雖使之通術經治文字。然要其大致。則在於明上之教。以導民。養人之材。以成俗。故師氏之位。必惟其能。某質性粹冲。術業通博。訓誨之任。宜正寵名。夫行其所知。以先游學之士。使風化之出。自京師始。待爾稱職。可不懋哉。

太學博士制

博士以文學爲官。往者列於成均。其秩未正。朕登之朝序。所以尊庠序之教。而勵士大夫也。爾以經行選用。往服厥官。蓋尊其所聞。以誘率學者。汝之守也。惟是懋哉。

少府監制

百工技巧之事。展采備物之政。典領之任。位視列卿。正名之初。考擇惟慎。某明習吏治。勞閱有聞。選於僉官。俾踐厥職。尙其飭以祗服訓詞。

軍器監制

繕治器械。訓工程作之任。置監典領。禮秩甚隆。正名之初。考擇惟慎。某明習吏事。勞閱有聞。選於在廷。俾踐厥位。尙其祗飭。以服訓詞。

大宗正丞制

司宗之於國族。門內之治也。然合遠近之屬而齊之。有不得專於愛者。其於斟酌緩急恩義之際。信難處哉。故其屬有丞。以參聽其事。而交修其官。考擇爾能。俾在茲選。夫親九族以刑萬邦。此有國之先務也。其體朕心。往從而長。服茲辭訓。以欽厥司。

諸丞制

丞於有司。參其政事。而察其稽失。以材選授。尙懋爾勤。

知開封府制

開封府朕建國焉。天下所並湊。衆大而俗雜。尹正之寄。非仁篤公勇。林任煩劇。不能稱其職。今朕修定官儀。正其名號。固將考求其實。使效見於事。則用人之際。豈輕也哉。某爽邁開達。練習治體。閱試惟舊。功用顯白。處以茲任。莫如汝諧。夫慈惠足以煦養惇弱。剛嚴足以帖伏奸強。然導民之方。尙有可識。使四方有以觀則。而朕有以仰成。

在汝勉哉。以稱朕命。

開府儀同三司制

開府之於榮名重矣。矧優其禮。命視於三事。故其品爲第一。所以隆崇大臣。古今之通制也。朕順於舊典。考正官儀。惟是首於文階。是用制其祿入。秩莫厚焉。非時宗工。夫豈虛授。某材資桀異。識慮閎深。莊重足以鎮浮。精明足以成務。熙帝之載。有贊元經體之庸。提將之符。有折衝綏遠之效。今百揆攸敘。方內靖嘉。時乃之功。助朕致此。是用峻其名秩。卑此寵章。夫褒有功。顯有德。朕於尊獎近輔之心。可謂至矣。親百姓。撫四夷。爾於將順朕志之義。可不懋哉。尙體至懷。往承厥敘。

開封府獄空轉官制

京師天下之聚。俗雜五方之民。至於智或侵愚。強或凌弱。巧僞滋出。獄訟繁興。統理之難。爲日已久。某明敏開達。曉習吏事。輟自禁近。屬之尹正。以公於奉上之志。絕阿以附下之私。摘發姦欺。動而必中。彈治豪右。勇於敢爲。使縲絏無非罪之嗟。囹圄有空虛之效。求之近歲。罕能及此。聞於朕聽。時惟汝嘉。夫實所以褒善而勸衆也。進官一等。疇爾之庸。其尙懋哉。以永來譽。

樞密選官加殿學士知州制

典國樞要之臣。協相帷幄之謀。彌綸疆場之事。夙夜不懈。風力施於省決。精明用於思慮。蓋勤且煩如是。而歷時且久。豈朕優禮耆舊之意歟。某忠嘉惠和。德操惟邵。先帝所遺。以輔朕躬。當國本兵。庶言惟允。而屢辭幾政。每請彌確。志不可易。朕所重違。是用改進文階。延升秘殿。乃眷東夏。處以近藩。衍食實封。併加寵數。朕於隆崇近輔。時其勞逸。使得自擇出入之宜。可以爲有恩矣。爾於乃心王室。罔以內外。無忘益勵。始終之節。其可以不勉哉。

蓋用儒學之臣入閣侍讀所以考質疑義非專誦習而已其列於分職始自開元而朕尤意嚮之莫博通今古服在從官茲選甚高屬爾惟允朕以未聞於史者究觀前世之變而至夫理亂興壞之際未嘗不反復焉通悉所知以輔朕志是爲爾守其往欽哉

殿前都指揮使制

朕擇材勇之士備宮屯之兵以宿衛京師填拊方夏置帥殿陛屬之董齊非強毅忠勞閱試惟舊不在茲選豈非重歟某篤實沉雄明於策慮護邊制敵身有顯庸茲用命爾就列大廷典綏王旅建旄立纛爲國藩翰爰田眞食並錫寵恩夫兵有擊刺射馭之能有坐作進退之法教習可以程其技節制可以閑其侮然能使之合心一力則在知所以附之能使之取威決勝則在知所以用之審如是焉厥惟艱矣蓋熟之於易所以圖其難得之於素所以應其變非造形而後定計非合戰而後屈人故師飽於逸而朝廷尊馬肥於休而夷狄弢惟予之武以無敵於四方則爾之良亦有聞於來世往遵辭訓以服厥官

使相制

在昔大雅所歌成周之盛呂侯申伯並爲國藩休父太師實將王旅出入踐更之雖異中外屏毗而則均時予宗臣分保近服蓋循斯義以告在廷某精慮造微翹材絕衆崇論閎議富於文辭強識博聞飽於術學田禁林之獻納任廊廟之弼諧浸更歲時休有功烈而屢形懇請願避煩幾雖敦譬之甚勤顧壯懷之難奪是用錫之土宇寵以節旄視宰路之等威益爰田之恩數往釐東夏外倡庶邦予有式羣辟之典彝爾其底迪予有覃四方之德澤爾其布宣以夾輔於本朝以阜康於生齒配於前哲屬在老成其代天工矧久聞於大政乃心王室尙思告於嘉猷

節度使制

有地千里。治兵與民。內衛京師。外拊疆場。非文武器幹。望臨一時。朕所寵嘉。不在茲選。某溫良能斷。沉靜善謀。直道著於當官。周材見於經務。承流宣化。善政有聞。綏遂折衝。壯猷彌顯。是用錫之士宇。授以節旄。生齒實繁。屬爾以安緝。師屯甚衆。諉爾以訓齊。以作朕股肱之良。以爲國藩輔之重。無忘忠力。庶訖外庸。惟亮天工。待汝守四方之效。無輕民事。副予安百姓之心。尙體眷懷。豈煩多訓。

節度加宣徽制

維昔牧伯長帥之官。有土與民。共於外服。所以爲國藩輔。今方鎮之任。連數十城之地。籍兵與衆而授之。建旄立纛。殿於大邦。以作衛王室。亦惟用稽於古。非文武之特才。擅一時孰能稱茲選哉。厥有顯庸。宜加寵命。乃揚孚號。以告庶位。某莊毅足以任重。肅哲足以裨身。有能斷大事之明。有克勤小物之愼。考於僉議。付以成師。宣化承流。實俾治體。折衝綏遠。克暢武經。故能紓朕之憂。副人之望。夫德茂者其賞異。功隆者其報殊。是疇其底績之勤。錫以宣猷之號。揆於常典。非朕爾私。蓋位重者其憂深。祿富者其責厚。名數禮秩。朕旣無忘爾勞。功實事爲。爾尙協朕之志。矧夫填臨塞路。總領兵防。班籍聯於輔臣。謀畫參於國論。其思勉勵。以副眷懷。

軍帥制

爪牙之臣。典領周衛。非特強主威。以鎮內外也。蓋禮彌威者備彌飭。上下之節然也。則任吾事者。豈可以非其人哉。某沉勇忠實。勞閱有聞。蔽自朕心。俾供厥服。仍遷位等。其尙欽承。

將軍制

朕有連營列校之衆。以宿衛京師。鎮撫諸夏。能使士齊而奮。其惟統督之臣。求之在廷。其選甚重。某忠勇仁厚。將以致謀。使治吾軍。必能副朕所屬。今閱士之藝。朕皆親臨。拔其異能。而汰其疲軟。其於撫循訓勵之方。可謂至矣。爾於典領。惟公賞罰。可以服其心。惟篤恩信。可以致其力。使處則有以養朕之威。出則有以揚朕之武。待爾任職。

稱朕意焉。

都虞候制

士之以材武宿衛左右者。其選甚精。而虞度候視於軍中者。其任甚寵。某忠勇有勞。宜在此位。進遷使號。其往欽承。

都知制

門闥房闔之間。朝夕給事。非謹信忠篤。烏可以處斯任哉。某服勞左右。閱歲已深。淑慎厥躬。朕所考察。俾率厥屬。往惟汝宜。其思永於厥修。尚終綏於榮祿。

內臣制

給事長秋。服勤惟舊。今其老矣。思就便安。錄爾之勞。宜進位等。尚思祗服。以稱朕恩。

責帥制

朕拊士於閒暇之時。蓋將責其效也。至於臨敵。連亡。朕雖假之以恩。而將帥之臣。則當濟之以肅。使紀律章明。然後威可厲而士可用也。爾握兵之要。宜知其職。而潰卒之入。煦煦受之。勞問餉給。如勞歸師。使夫三軍之衆。將何視焉。有苟簡姑息之心。無守正奉公之誼。閫外之事。朕執賴哉。議罪正刑。有國之典。奪其近職。處以偏州。肖自省循。茲爲薄責。

監司制

分部而使。連數十城。事之與奪。吏之黜陟。係焉。古方伯之任也。其選甚重。固無假人。爾修潔純明。治行強敏。刺督之寄。往共厥服。夫與使政舉刑清。和樂交於上下。人足家給。富饒洽於公私。皆汝守也。可不念哉。

廣西轉運使制

自既開百粵。而地盡南海。提封萬里。莫不內屬。本朝之制。始分桂林。以爲西部。非獨鎮撫吾民。亦以綏馭山居谷聚。並海之蠻夷。故將命而使。其選常重。爾嘗試而可用。是用任屬。夫柔遠則能適。其務宣布上恩。輯寧異土。無失朕指。往欽厥司。

蜀轉運判官制

西南之地。延袤萬餘里。外臨殊俗。內雜谿谷諸蠻。列州成縣。以保安吾民。境大人衆。故蜀部爲四。而利居其一。最遠且險。參於使事。其選甚高。求於在廷。是用屬爾。夫保民以仁。而懷遠以德。茲朕所嚮。其往欽哉。

轉運使制

國家歲漕東南之粟。以實京師。故命使部之臣。推擇能吏。使度材具舟。以濟其役。爾應其選。歲課其優。是用遷秩京司。以爲爾寵。朕於臣下之勤勞。雖微且遠。無所遺失。則爾之自效。可不勉哉。

陝西轉運使制

分部而使。兼地數千里。治兵於民。與夫征賦之出入。自陝以右。則又與疆場之事。其於寄屬。必惟其人。察於在廷。無以易爾。夫使督課明而政事舉。經畫當而財用足。吏與士皆悅而勸。兵與民皆瞻而靖。爾之任也。其尙起哉。

提舉常平制一

朕憫農之不易。故擇材謂之臣。分部四出。以奪其政令。而佐其衣食之業。爾以能聞。當是任屬其務。知朕之意。在於惠民。往慎厥司。慰彼黎庶。

提舉常平制二

朕憫夫農之艱且勤。故詳爲勸助之政。又擇能吏。分部四出。使推而行之。爾以材聞。預在茲選。其思宣布朕恩。使敦本業之民。安其田里。而足於衣食。則爾爲能稱其職。可不勉歟。

知州制

昔先王之法。導民以德。齊之以禮。而有恥且格。後世不及。然破觚以爲圓。斲雕以爲樸。禁罔疎闊。而吏治蒸蒸。不至於姦。猶爲近古。朕甚慕之。今能與吾共成此理者。其唯循良之吏乎。以爾爲能。與在茲選。使刑罰清而風俗美。爾能善於其職。則明考察而公賞勸。朕豈貳於必行。其尙自強。方觀爾效。

知河陽制

盟津冀豫之域。背河向洛。成皋之間。天下之重地也。山川之固。爲國屏翰。分土而治。非文武之特。曷可以當選授哉。某以材進拔。閱試已孚。俾仍近班。往祇厥服。有生齒之衆。屬爾撫和。有連營之師。待爾綏輯。尙茂循良之效。庶寬西顧之憂。

知軍制

開建城壁。本以輯治軍旅。今四方旣平。而假守之臣。責任民事。列於有土之官。矧朔北並邊。寄屬尤愼。爾以選擇。往祇朕命。夫能宣布恩威。以拊循吾人。而懷附異俗。則爲善於其職。尙思爾守。無替訓辭。

通判制

州有治中。以攸助其長。紀綱衆務舊矣。今列城之守。皆有貳焉。蓋亦其任也。爾以考擇。往祇厥敍。尙思稱職。以報朕恩。

罷館職加官判

夫爲官擇人。處其名者必任其事。而儒館之設。有位號而無分職。使學士大夫。將何以效其實。歟。是用命爾進階一等。而罷其虛稱。其有異能。朕將明試以功。庶爾之材得施於用。以成朕招俊乂。康庶位之責焉。其尙懋哉。

賞功制一

王師西封。爾能奮力行陣。斬獻首馘。稽諸賞典。宜進官榮。爾尙勉哉。益圖來效。

賞功制二

擐甲執兵。人之重任。賞信而速。所以勸功。爾爰整我師。徂征西土。大殲醜類。來獻厥俘。圖爾之勞。進階一等。尙思奮勵。以侔異恩。

團練使駙馬都尉制

大長公主。吾姑也。位號禮服。褒崇光大。國有彝章。蓋其下嫁。必得勳閥之門。良能之士。然後可以成先帝愛育之仁。而稱朕隆崇之誼。某貴舊家子。內外行完。是用選見於庭。命之進尙。團兵重任。倖馬美名。兼而授之。蓋稽故事。夫恭儉靖慎。可以保令聞而綏寵祿。茲惟朕訓。汝尙勉哉。

磨勘轉官制一

吏之在其位者。積歲月之勤。應有司之格。必有甄進。以明勸獎。此國家之典也。今序爾之勞。遷位一等。往思祇服。以稱朕恩。

磨勘轉官制二

朕謹名分。正官守。以董齊百工。至其有試用之勞。無踐履之玷。則皆稽其歲月。法有甄進。所以使吾勤事之吏。知所勸也。今有司比爾之課。應於遷格。宜升階品。以允新書。其服朕恩。往思來效。

軍功制一

惟羌稔惡。世盜西疆。理將殄除。內自生變。致天之伐。非朕敢私。爾躬提偏師。摧陷醜類。震動河外。宣明國威。破竹之功。成在旦夕。賞不逾月。朕尙遲之。用遷爾官。以勵衆士。能殲大憝。當有異恩。

軍功制二

河外之地。我之舊服。羌能靖縱。則以畀之。今其將亡。自相戕害。爰命討伐。蓋將天威。某沉勇有謀。提兵以出。獻俘斬馘。屢奏厥功。擢進使名。以招信賞。能殲首惡。尙有異恩。

軍功制三

朕惟羌之猖狂。內相賊殺。致天之伐。爰命六師。止除罪人。復吾故地而已。爾握兵而出。屢以捷聞。蓋夫軍賞之行。速則重勸。是用選爾之秩。以激士心。尙有不次之恩。以待凱還之喜。

新及第授官制

朕立學以養天下之材。設科以進其造秀之士。其於教導推擇。欲成美俗於四方。得羣能於庶位者。可謂盡其意矣。爾以經行文學。選自朕躬。命以一官。將觀汝效。往祗厥敍。思稱朕恩。

責將制

汝始以微功進。朕不次用汝。而屬之守邊。乃冒吾法。出蠻夷之中。發人採金。無出入之藉。有侵盜之形。朕惟不欲數使遠人。煩於追逮繫獄也。寧失汝罪。不究窮之。

堂後官轉官制

吾調兵於外。而號令節制之。由中出者。汝以宰屬。與於治文書。赴期會。能辦吾事。進秩一等。以獎爾勞。尙思恪勤。無墜厥守。

詔

勸學詔

朕惟先王興庠序。以風四方。所以使學士大夫。明其心也。夫心無蔽。故施之於己。則身治。而家齊。推之於人。則官修。而政舉。其流及遠。則化民成俗。常必由之。古之所以長人材。厚人倫者。本是而已。朕甚慕之。故設學校。重學官。

之選而厚其祿。凡欲以誘誨學者。庶幾於古也。而在位者無任職之心。承業者無慕善之志。至於師生相冒。挾賂爲姦。鬻訟囂然。駭也衆聽。而況欲倡率訓導。洽於禮義。磨礱陶冶。積於人心。使方聞修潔之士。充於朝廷。孝悌忠篤之風。行於鄉邑。其可得乎。朕甚憫焉。故更制博士。而講求所以訓厲之方。定著於令。以爲學制。予樂育天下之材。而庶幾先王之治者。可謂至矣。自今有敦行誼。謹名節。肅政教。出入無悖。明於經術者。有司其以次升之。使聞於朕。將考擇而用之。以勸於爾衆士。有偷懦怠惰。不循於教學。不通明者。博士吾所屬也。其申之以誘導。使其能有易於志。而卒歸於善。固吾之所受也。予旣明立學之教。具爲科條。其於學者。有獎進退黜之格。以昭勸戒。至於學官。其能明於教學。而詳於考察。有得人之稱。則待以信賞。若訓授無方。而取舍失實。亦將論其罰焉。明以告爾。朕言不欺。尙其懋哉。無貽爾悔。

勸農詔

夫農。衣食之所由出也。生民之業莫重焉。一夫之功。所耕百畝。養生送死。與夫出賦稅。給公上者。皆取具焉。不幸水旱螟螣之災。往往而有。可謂勞且艱矣。從政者知其如此。故不違其時。不奪其力。以使之。明時之因。所以授之。差地之腴瘠。以處之。春省耕。秋省斂。以助之。詩曰。黷彼南畝。田畯至喜。言上所以勞之也。又曰。駿發爾私。終三十里。言上所以勸之也。其獎勵成就之者如此。朕自承天序。內重司農之官。外遣劭農之使。後之弛力役。均地征。修水利。或一雨愆期。則憂見於色。成一穀不成。則爲加惻怛。有復除之科。有賑恤之令。夙夜孜孜。焦心勞思者。凡以爲農也。今耕者衆矣。而尙有未勉。墾田廣矣。而尙有未闢。豈拊循勸率。有所未備。與抑吏怠而忽。不能宣究。與有司其於農桑之務。益思所以除害興利。詔令已具者。無或壅闕。所未盡者。勿憚以聞。要使緣南畝之民。舉欣欣然樂職安業。洽於富足。稱朕意焉。

正長各舉屬官詔

蓋聞堯之治曰百姓昭明舜之治曰四門穆穆然則當是之時在位皆君子其是非不惑可知也故堯欲罄百工舜欲熙帝載求可任者皆訪諸四岳因四岳以命禹又因禹以命稷契皋陶因羣臣之僉曰以命垂益伯夷因伯夷以命夔龍其審官用賢不自任其聰明而稽之於衆如此然存於書二帝所命者羲和九官十二牧皆官之正長也至於屬官則未有二帝嘗命之者其遺法之可考則周穆王命伯景爲太僕正戒之曰慎簡乃僚無以巧言令色便辟側媚其惟吉士則自擇其官之屬者官之正長之事此先王之成法也漢魏以來公府郡國亦皆自辟其屬而唐陸贄請使臺省長官自擇僚屬蓋上下之體相承如此以周天下之務此古今之通理也今朕董正治官始自三省至於百工皆正其名夫使在位皆君子而是非不惑此朕素所以厲士大夫也故凡官之長貳朕既考擇而任之尙書政本也自卽已下用吏甚衆其令僕射左右丞尙書侍郎各於其所部員有未備皆舉二人以聞朕將擇而用之其未用者亦識其名以待用朕稽於古以正百官稽於衆以求天下之士其勤可謂至矣惟官之長貳之臣皆朕所屬以共成天下之治其尙體朕意所舉惟公以應朕之求所陳惟實以嚴朕之詔其得材失士有司其各以等差具爲賞罰之格朕將舉而行之賞吾不吝罰亦無捨非獨搜揚幽滯庶幾爲官得人亦將以觀吾大臣之能使朕得與衆士大夫各志同心以進天下之材作則垂法行之於今以詒後世追於先王之成憲無令唐虞有周專美於古不其美歟咨爾庶位其論朕意【一作懷】

賜高麗詔

蓋聞昔在夏后分天下爲五服地有遠近故治有詳略而聲教之盛東漸於海朕甚慕之顧德不明何以逮此而爾東國之君款誠內附數遣使者乘不測之川獻其方貢惟爾之義朕實寵嘉宜有異恩以稱勤恪而爾比緣養病以醫爲請眷然東顧朕預憂之是用擇遣方技之官具舟以往爾惠彼一方神明相祚藥劑所補以時康寧達於予聞欣慶方屬而遽馳僚從來致謝章覽以慰懷獎歎良厚爾自乃祖以來保乂彼土其尙頤精神強飲食格

於眉壽。以均福於有衆。使爾有世濟其美之功。而朕預聲教及遠之休。其始自今。永孚於好。

策

擬代廷試進士策問三首

策問一

朕有志於卑漢唐之治。而欲比迹於唐虞三代之盛。故於書無所不學。而通其意。於天下之事。無所不講。而極其本末。於人之材。長養成就之者甚厚。求而用之者甚至。於民之務。憂勤思念者甚詳。撫而綏之者甚力。患風俗之蔽也。正己以先百姓。而明於教示。患政理之陋也。稽古以定制度。而謹於持循。欲斥大疆土也。勞於經武。欲懷附夷狄也。廣於推恩。人之所欲者不敢違。人之所惡者不敢強。實不敢以喜而濫。刑不敢以怒而淫。羣臣之進對者。夕請而朝見之。四方之奏事者。旦入而暮報之。未嘗有聲色之娛。未嘗有畋遊之好。不營宮室。不崇苑囿。衣服飲食。取具而已。兢兢業業。不敢暇逸。日慎一日。十有六年於茲矣。惟先聖王之烈。雖自視欽然。察其用心。如朕者。亦可以無憾矣。然古之大有爲之君。必有大效於天下。至於小能小善。亦各有小裨焉。奚獨至於朕也。意彌篤而功未見於人。行彌勵而德未見於世。豈所謂是者非歟。所請能者否歟。抑所行者爲可止歟。所舍者爲可用歟。將在位者奉承法令。苟爲空文。而不務究宣朕意歟。意者今去古遠。先王之政。不可以復歟。凡朕之所爲。由前者其失安在。宜於今者。先後施設。其要如何。唐虞三代之所以成功德者。孰近於今。可推而行之。漢唐之卑者。孰存於今。可革而去之。其悉心以對。朕將自擇。

策問二

夫有二南之化。則有羔羊之大夫。兔置之士。廣漢之女。其成人之材。則見於思齊。其成物之性。則見於行葦。蓋王者之治。由近及遠。其効如此。何其風俗美而流澤深也。今朕躬禮義以先天下。恐其未喻也。崇庠序以導之。歷